

## Surat 2025

### Esperansa klean liu esperansa hotu

Rona ba fóin-sa'e sira iha Taize no fatin seluk<sup>1</sup>, sira barak mak enfrenta ou hasoru situasaun susar iha sira-nia moris loroloron, ha'u husu ba ha'u nia an oinsá sira hetan fórsa atu kontinua. Mahusuk ne'e sai klean liután wainhira hare'e sira hela iha zona funu nian.

Husi ne'ebé sira hetan fórsa no perseveransa iha situasaun imposibel sira? Ida ne'e sai klaro ba ha'u, wainhira ha'u rona, katak konfia iha Maromak bele haburas ema fiar na'in sira nia esperansa. No liu husi Na'i Jesus nia Moris-Hias hatudo katak mate sei laiha liafuan ikus.

Konfia iha Na'i nia Moris-Hias fó esperansa katak moris todan la'ós mak finalidade ba ita nia moris. Tan ne'e ita simu convite ba buat ruma tan. Ida ne'e mak esperansa foinsa'e sira hakarak fahe ho ha'u. Esperaza ida ne'e klean liu esperansa sira hotu tamba ida ne'e konta kona ba moris foun wainhira hare'e'e hanesan buat hotu besik atu lakon<sup>2</sup>.

Maria hananu iha nia tanis hodi hahi'i' ho esperansa: ho nia liman nia fórsa, Maromak haketak ema sira be fóti-an. Maromak hatún kbi'it na'in sira husi sira tronu no fóti aas ema kiik sira. Maromak hariku ema sira be hamlaha ho buat di'ak hotu no haruka ema riku sira ba ho liman mamuk (Lukas 1: 51-53). Los duni, mai ita brani hananu ho nia no harohan ba situasaun sira atu iha mudansa. Maski dalaruma ita sente hanesan Maromak nonok hela, teki-tekir dalan ida bele nakloke<sup>3</sup>.

Iha tempo hanesan mai ita halo buat ne'ebé ita bele, maski ladún barak, hodi hatudo sinal solidariedade ba ema sira haleu ita ne'ebé iha terus laran, ka sira be moris iha funu nia laran ka hetan fórsa atu husik sira nia moris fatin ou nasaun. Laos ida ne'e mak buat ne'ebé fó brani ita atu iha esperansa klean liu esperansa hotu?

Reflesaun tuir mai ne'e barak liu mai husi ha'u nia hasoru malu no dada-lia ho foinsa'e sira ne'ebé hela iha funu ou zona konfliktos iha tinan hirak ikus ne'e. Ha'u fuan nakonu ho gratidaun ba sira ne'ebé fahe sira nia esperiensa no hanoin ho ha'u no mós ba ha'u nia maun-alin foinsa'e sira ne'ebé ho kuidado tau buat hotu iha orden.

*Brother Matthew*

## **Aten-brani atu iha esperansa**

Wainhira ita iha hakarak atu fiar iha Na'í Maromak nia domin, ita hare'e no sente hanesan buat ne'ebé haleu ita, dala wain, kontrario ho domin ne'e. Ita hela iha klaran ho buat ne'ebé iha ona no buat ne'ebé sei mai. Espaso ida ne'e la sempre fasil ka komodu. Maibé wainhira ida ne'e fó dalan atu hetan esperansa<sup>4</sup>, entaun ita sei sente ou hetan libre iha ita nia laran.

Esperansa presija pasiensia. “Ita iha esperansa ba buat ne'ebé ita la bele hare'e” (Romano 8: 25), apostulo Paulo dehan, nakloke an ba buat hotu ne'ebé sei akontese iha Na'í Maromak nia Tempo, “maski ita terus iha ita nia laran no la ta'uk iha liur” (2 cor 7:5), ita aten-brani atu hela iha espasu hanesan ne'e ka ita halai husi fatin ne'e?

“Esperansa hasoru esperansa sira hotu, Abrão fiar” (Romano 4:18) Abrão tahan ka hametin ema barak nia fiar. Nia kaer-metin ba Maromak Nia lia-hakotu liu fali razaun sira hotu esperansa nian. Nia ho nia fen Sarah simu buat ne'ebé parese la imposivel ba sira.

Ita tempo ne'ebé ninia rain sai rahun tan funu no ema sira hetan ameasa husi dadur, no nia rasik hetan dadur iha prisaun, profeta Jeremias halo sira hateke metin ba futuro: Nia sosa rai ida, no Nia sente katak Na'í Maromak sei la abandona nia emar sira (Jeremias 32:6-15).

Jestu esperansa kmanek nune'e mak halo fiar sai real liu tan. Ne'e mak fiar ida metin iha buat ne'ebé ita la hare'e no dalaruma ita sei laran-rua-rua hela. Bele ka, ita kaer-metin ba esperansa ida ne'e? Ida ne'e, loos duni, loke hikas ksolok nia hun<sup>5</sup>. Maski iha situasaun ema nian ne'ebé komplikado liu, buat ne'ebé ita nunka brani atu iha esperansa bele sai realidade.

Ohin loron, inisiativa kmanek tebes esperansa<sup>6</sup> nian sai buras iha rai hirak be funu mak hamate tiha.

## **Rona ba ema sira ne'ebé iha esperansa**

Atu tulun ita hodi kompriende diak liu sa mak esperansa, ita presija rona ba ema sira ne'ebé hela iha situasaun susar no violencia nia laran. La'ós liu husi sira nia lian halerik mak Na'í Maromak hatudu dalan ba ita?

Durante ha'u nia visita ba Ukraina hamutuk ho ha'u nia irmaun na'in rua, ulun kreda nian ida dehan mai ami: orasaun loke dalan ka fo fatin ba ema atu hetan kura. Ha'u hakfódak ho sa mak nia dehan. Nia nafatin sente terus sira ne'ebé nia emar sira hasoru, nia hare'e'e katak buat ne'ebé iha sira laran be klean liu iha mak halo sira fiar no nakloke hodi simu buat foun.

Ne'e mak prosesu ida ne'ebé la presija hetan lalais ninia resultado, maibé, karik hetan tulun husi parte seluk, loke dalan atu manan kanek no terus, no hafanun esperansa kura nian iha umanidade. Orasaun mak habrani ita atu hamri'ik metin iha situasaun difisil hotu<sup>7</sup>. Nia harahun laloran ta'uk nian, wainhira nakukun hafalun buat hotu.

Inan feton palestina ida be hela iha Fransa, maibé nia familia iha Gaza, hakerek mai ami nune'e: “domin ne'ebé bele kous kanek, fraku mak hafoun energia”. Ida ne'e halo ha'u

hanoin fila fali kona ba mane isin-mate iha Evangellu<sup>8</sup>, ne'ebé nia belun sira ho fiar lori nia ba Na'í Jesus. Nia hatutan: “Orasaun mós mak dalan ida atu ita la hakiduk, no ida ne'e mak importante ba ha'u. Maibé ha'u ema ida. Hafoin rona katak membru na'in rua husi ha'u nia familia mate, hirus hafalun ha'u, ha'u hakilar no ha'u tanis...Maibé wainhira ha'u hare'e didiak, ha'u hatene katak Na'í Maromak presente iha terus no susar hotu, ne'e hatudo katak Na'í Maromak nafatin hamutuk ho ita.”

Bailoro tinan ne'e, wainhira nia visita Taizé, nia dehan: “dader-dader ha'u harohan atu hetan kbi'it hodi hadomi no la rai odio.” Nia liafuan sai hanesan lampu be leno ita dalan.

Foinsa'e feto ida husi rai ida iha Asia ne'ebé iha funu laran dehan mai ha'u: ami nia emar sira hetan terus maka'as maibé hetan kma'an iha evangellu. Dala hira ona mak Na'í nia emar sira iha situasaun nune'e? Nune'e mós, comunidade nafatin iha maske situasaun todan tebes. Dalaruma Maromak iha plano di'ak liu ba ita, maibé ami tenki hakat neneik lor-loron. Ohin loron, moris hela (vivo) mak presente boot liu no ne'e hatudu katak iha moris (vida) no presiza goza didi'ak. Iha orasaun, ita hetan dame atu habrani malu, hetan sentidu iha solidariedade.

Husi Libano ha'u rona liafuan hirak ne'e: ha'u nia ama mak sai sasin lolos ba esperansa. Iha situasaun susar saida deit, nia hamri'ik metin nafatin. Tamba nia mak ohin loron ha'u nune'e. Nia hanorin ami atu fiar iha Na'í Maromak no reza. Ema ida-idak be moris ho fiar-metin tamba sira hemu husi fiar nia hun no bele sai sasin.

Se mak sasin esperansa nian be ita ida-idak bele deskobre no rona ba iha ita nia situasaun rasik? Mai ita loke ita tilun hodi rona saida mak sira dehan.

## **Luta ba esperansa**

Oinsa ita hatán wainhira ita nia planu sai frustrado no ita nia esperansa sai nabén? Jesus fó mai ita pontu importante oinsa ita bele sai nafatin ema ho esperansa.

Nia hasoru ema lubun boot be hamlaha, Nia “hatudo laran-luak” ba sira, no “Nia Fuan dodok<sup>9</sup> waihira hare'e sira. Ne'e duni nia buka dalan atu hatan ba sira nia nesesidade.

Wainhira ita brani atu la hases-an husi situasaun susar no difisil sira mak esperansa moris iha ita laran. Ne'e mak kontrariu los husi hein pasivamente, basá ida ne'e ejize hakaas-an ka luta<sup>10</sup> no laiha dalan seluk. Iha ita nia hamro'ok ba esperansa ne'e rasik bele tulun ita hakat liu ba situasaun ne'ebé imposivel ba ema maibé bele deit ba Na'í Maromak.

Esperansa ne'ebé mai husi Kristu mak halo ita koko saida mak sei mai wainhira Nia reinu to'ó mai. Ida ne'e hanesan ankor ro nian<sup>11</sup>. Nia kaer-metin ita, wainhira laloran baku maka'as. Nia permite ita atu nafatin sai sasin sinal fidelidade ba vokasaun ne'ebé ita simu no ema sira ne'ebé ita serbi. Ida ne'e hanesan mós helem<sup>12</sup> ne'ebé proteje ita husi susar aat hotu ne'ebé mai hasoru ita.

Regra Taizé nian ko'alia konaba nunka atu rende husi ita nia an “ba eskandalo husi kristaun sira ne'ebé prontu haklaken domin ba maun-alin sira maibé nafatin fahe-malu.”

Ba irmão Roger unidade kristaun nian<sup>13</sup> ne'e la'ós objetivu ida deit, maibé ida ne'e dalan ne'ebé lori dame ba familia humanidade<sup>14</sup>.

Aihoris kiik sira ne'ebé moris haleu iha Taize, haraik-an tebes, maski hetan estragus dala-rua tinan hirak ikus ne'e, teki-tekir moris fali. Husi buat ne'ebé parese mate tiha ona, sanak foun buras nu'udar malahuk nakfilak ba matak. Natureza luta atu moris, nu'udar lalenok hodi enkoraja ita nia luta sira ba esperansa. Esperansa ba kriasaun<sup>15</sup> no esperansa ne'ebé haraik husi Na'i Maromak nia kriasaun, lao hamutuk ho esperansa ba humanidade<sup>16</sup>.

### **Hamri'ik metin nu'udar ema Esperansa nian**

Esperansa bele mihis wainhira ita hasoru situasaun ne'ebé komprensaun mutua parese imposivel. Hamosu ambiente denkonfiansa fó risku ka lasu ba ema seluk atu laiha konfiansa.

Ida ne'e bele akontese iha ita nia komunnidade, uma-kreda, no familia nune'e mós sociedade no ita nia nasaun. Dinamiku hanesan ne'e bele subar-an hela ka bele nakloke, maibé sira nafatin halakon ita ita nia forsa. Maski nune'e iha tempo balun ne'ebé ita hasoru injustisa, ita tenki denuncia diabo atu nune'e ema seluk labele sai viktima ba ema seluk<sup>17</sup>.

Atu hela iha esperansa ita presija malu. Esperansa sai buras wainhira ita matan-moris ka atentu ba ema seluk nia presija. Ita hare'e ema sira ne'ebé, maske hasoru terus ka susar boot iha sira nia moris, nafatin hili atu moris, hatudo oin-midar no oferese aksaun ki'ik sira ne'ebé posible iha tempo agora.

Esperansa iha ligasaun ho lialos<sup>18</sup> no justisa. Ne'e tamba hatudu kualidade Na'i Maromak nian? Ita la hare'e kualidade sira ne'e iha Na'i Jesus nia moris, mate no nia Moris-Hias? Haburas esperansa presija pruntu atu simu realidade lolos no hare'e sira ne'e ho naroman Na'i maromak nia promesa nian<sup>19</sup>.

Foinsa'e ida hela iha ambiente funu nian dehan mai ha'u: ha'u lee hela ha'u nia libru iha warun kafe nian, wainhira roket sira hahu semo ba mai iha ami leten. Ema sira nakonu ho emósaun halai sai ba liur, maibé ha'u hakotu-lia atu tuur nafatin iha ne'ebá hodi lee. Buka fatin atu subar mak opsaun diak ida, maibé hodi fahe istoria ida ne'e sai nu'udar protesta esperansa nian ida hasoru funu nia aat.

Ha'u nia irmaun ida dehan mai ha'u: esperansa ne'e provokativo no liu fali ida ne'e, nia bele da'et. Kontrariu husi esperansa mak indiferensa ou reijignasaun ka hasees-an. Foin lalais ne'e ha'u visita ha'u nia nasaun, ne'ebé mós iha funu, ha'u hare'e'e ema oin triste, preocupa no estrés. Ne'e duni ha'u husu ba ha'u nia an: saida mak ha'u bele halo? No idea ida mosu: wainhira ha'u lori kareta no iha dalan ha'u iha direitu atu liu, ha'u sei para atu fó prioridade ba ema ne'ebé iha ha'u nia oin. Ida ne'e kusta segundu lima deit. Maibé ha'u bele hare'e ema sira nia oin, iha hahalok kiik ne'e, fó kman uitoan ba ha'u nia maun-alin ka feton nia susar.

Buat hotu iha ita-an rejenta funu no mate.... Buat hotu iha ita buka moris no kmook<sup>20</sup>.

## **Paskua esperansa**

Agora daudaun ha'u iha ne'ebe? Iha Sexta-feira Santa ha'u hamri'ik iha krus-hun? Iha Domingo Moris-Hias? ka hein hela no la hatene ba ne'ebé iha Sábado Santo?

Iha ne'ebé deit ha'u hamrik, ha'u bele hare'e'e kois dalan ba esperansa? Wanhira ha'u hateke ba Jesus ne'ebé fó Nia moris ho domin boot ba ema hotu, ida ne'ebé mak hatudo mai ita domin ida ne'ebe makas liu violencia, odio no mate, esperansa nakloke mai ha'u.

Esperansa la depende hodi analisa situasaun hotu maibé depende ba konfiansa ne'ebé dala-barak hanesan ahí lakan ki'ik ida. Maski fraku, ahi-lakan ki'ik ida ne'e lakan iha kalan be nakukun liu, hanesan akontese ba Jesus nia belun sira. Barak husi sira husik hela Nia iha tempu ne'ebé nia hasoru terus boot liu hotu. Ninia domin permite sira atu fila-fali ba Nia.

Karik ita bele rekoñese netik de'it Jesus nia Moris-Hias! Maibé ninia prezensa la depende ba ita-nia rekoñesimentu. Dalaruma ita nia kuran esperansa halo ita matan-delek hanesan Maria Madalena. Tan ne'e Jesus Moris-Hias husu ba Maria: "Tansá ó tanis?" no "ó-buka sé?" (João 20:15). Mahusuk daruak ne'e hanesan mós Na'i Jesus nia liafuan dahuluk iha Evanjellu S. João nian: "Ita-boot buka saida?" (João 1:38). Hafoin Nia tama klean liu ba ema nia experiesia terus no mate, desejo atu buka sentidu nakfilak tiha ba deseju ba presensa ida<sup>21</sup>.

Moris-Hias husi mate, no moris iha Maromak, Jesus dada ita hotu ba Nia-An<sup>22</sup>. Nia hasoru ita iha ita-nia an be kelan liu, maski ita-nia moris nakonu ho triste ka ksolok, Jesus Moris-Hias loke mai ita ninia relasaun ho Aman Maromak no komuñau ho nia no hamutuk iha Espíritu Santu. Ita la'ós ona dadur ba ita nia desespoero ka moris susar basá moris foun posivel.

Paulo hakerek: "Esperansa la halo ita neon-kraik, tanba Maromak nia domin naksulin ona iha ita nia fuan liu husi Espíritu Santu, ne'ebé fó ona mai ita" (Roma 5:5). Mai ita moris husi domin ne'e. No husik Espíritu Santu leno ita nafatin.

## **Peregrinu esperansa, peregrinu dame nian**

Fiar iha Moris-Hias halo ema barak kaer-metin ba esperansa iha susar laran. Ida ne'e mak abut husi ne'ebé lori ita ba klean liu iha ita nia imposibilidade rasik, atu nune'e bele husik ita nia fuan sai ba hasoru ema seluk no tau iha aksaun.

Atu fiar iha Na'i Jesus Nia Moris-Hias presiza aten-barani. Ne'e katak haka'as-an atu labele sai paralizadu ho prezensa mate no destruisaun ne'ebé hale'u ita ohin loran.

Husi situasaun sira ne'ebé parese laiha esperansa, Maromak bele kria buat ruma foun. Maromak bele lori moris sai hosi mate no mós rekonsiliaun sai husi konflitu.

Jesus nia belun fetu sira, ne'ebé ba sedu iha rate iha Páskua dadeer husu ba malu, "Sé mak sei dudu sai fatuk ne'ebe taka hela rate?" (Marcos 16:3). Fatuk saida mak iha ita nia moris ne'ebé ita tenke husu ba Maromak atu dudu sai tiha nune'e moris foun bele moris iha ita?

Moris foun ne'e tulun ita atu hamri'ik, nia lori ita atu lao hamutuk ho ema seluk. Ita sai peregrinu esperansa nian ne'ebé ita lori iha ita nia moris. Ida ne'e mós la'os esperansa ida ba dame? Tamba “Kristu mak ita-nia dame” (Efesios 2:14). Ita sei rona nia dehan ba ita: “dame horik ho imi; Ha'u nia dame Ha'u fó ba imi<sup>23</sup>. Ha'u la fó ba imi hanesan mundu fó. Keta husik imi nia laran-taridu no keta ta'uk” (João 14:27-28).

Nu'udar peregrinu dame nian<sup>24</sup>, ita komprende katak laiha dame loloos la hó justisa<sup>25</sup>. Dame ne'ebé ita lori iha ita an, ne'ebé mai husi esperansa ne'ebé ita moris ba, halo ita sai livre iha laran. No ida-ne'e permite ita atu hadomi moris no reziste injustisa, nu'udar Espíritu Santu tulun ita atu tahan iha susar laran.

Loron ida, ita bele hetan ita-nia an hananu knananuk Zacarias nian. Katuas ida ne'ebé hela iha rai okupadu, nia haksolok ho moris ne'ebé nia la hein no celebra, “ho Maromak nia laran-luak, loron foun husi leten aas ba sei mosu mai ita atu fó naroman ba sira ne'ebé tuur iha nakukun no iha mate sira leet, atu lori ita ain ba dalan dame nian” (Lucas 1:78-79)

Ita pronto atu iha esperansa klean liu fali esperansa hotu?

*Kristu ne'ebé Moris-Hias,*

*Liu husi Espíritu Santu nia prezensa,*

*Ita hasuli ona Na i Maromak nia domin iha ami nia fuan*

*no Ita fó kbiit mai ami atu iha esperansa ne'ebé klean liu fali esperansa hotu-hotu.*

*No husi ami-nia laran be klean liu, neneik-neneik,*

*dame ida mosu mósu mai.*

*Hahi Ita-Boot ba nafatin!*

---

<sup>1</sup> Iha Maio 2024, ho ha'u nia maun-alin nain rua ami viajen nu'udar peregrinu ba Ucraina. Durante veraun, ami simu iha Taizé foinsa'e sira husi Myanmar, Nicaragua no Ucraina. Iha outuno, ha'u iha dada-lia online ho foinsa'e sira husi rai sira ne'e no mós hus Belém no Líbano, wainhira ha'u nia maun-alin nai'in haat fila-fali ba Ucraina hodi visita husi tasi-feto too tasi mane.

<sup>2</sup> "Laiha esperansa wainhira laiha experiencia kona ba lakon horizonte, ne'ebé hanesan los nakukun durante loron manas no obriga ema ida-idak no ema hotu atu halakan sira nia ilusaun." Corine Pelluchon in *L'espérance, ou la traversée de l'impossible* (Éditions Payot & Rivages, Paris, 2023) p. 8

<sup>3</sup> Esperansa mak ema nia hatán ba Maromak nia nonok/silensiu. Jacques Ellul, quoted by Anne Lécu [www.revue-etudes.com/article/esperer/24779](http://www.revue-etudes.com/article/esperer/24779)

<sup>4</sup> Iha komentariu ida kona ba Dt.431, Gustavo Gutierrez hakerek; "Maromak sei la haluha ninia Lia hakotu; loialidade ne'e uluk nanain memoria. Atu fiel/setia ne'e katak atu hanoin fila-fali, la haluha ita nia kompromisu, atu iha sentidu tradisaun uituan. Loialidade ba aliansa ne'e katak hanoin fali abut ba aliansa ne'e no ninia demanda sira (...) Maibé fidelidade lolos implica liu fali ida ne'e; nia requere mós, maske ida ne'e hare'e hanesan ladún klaru, projeksaun ba futuru. Atu iha memoria la'os kata kita tenke hela metin iha pasadu. Hanoin fali horseik ne'e importante, maibé ida ne'e importante tamba nia tulun ita hateke ba loron aban (...) Fidelidade la'os katak tuir deit dalan ne'ebé iha ona la ho iniciativa, maibé hodi hafoun sira nafatin; nia lori ita- nia tenke lori ita – atu inova/hafoun, atu troka, atu dezeña projetu foun" (Gustavo Gutierrez, *El Dios de la vida*, Ediciones Sígueme, Salamanca, 1992, pp.82-83)

<sup>5</sup> Iha dada-lia barak ho foinsa'e sira hela iha situasaun funu, Barak husi sira ko'alia kona ba hananu nu'udar hun ba ksolok no forsa. Surat ida ne'e sei publika iha sorumutu Europeu 2024-2025 iha Tallinn. Mai ita keta haluha "Revolusaun Hananu" nian ne'ebé kontribui mmaka'as ba Estonia manan hikas sira nia independencia iha 1991. Ema tuun ba estrada sira ho hananu hodi konfronta ameasa ne'ebé sira hasoru.

<sup>6</sup> Ema ida ne'ebé irmaun balun hasoru iha sira nia peregrinasaun dehan ba nia: "Iaran-nakali kreativu ida horik hela iha ha'u". forsa ida ne' e mak dudu nia hakarak, pelu menus, halo buat kiik ruma hodi muda situasaun ne'e.

<sup>7</sup> Husi starets (siluan), nia (Sophrony Sakharov) aprende barak no sai fundamental ba nia moris espiritual. Buat rua importante: oinsa hasoru abandono wainhira iha orasaun la hasoru Maromak maibé esperiensa mak mamuk no desolasaun, no oinsa hasoru neon-susar ne'ebé akompaña wainhira harohan ba mundo be terus maka'as. Ida uluk ne'e fo sentidu husi konseitu katak Maromak-husik mesak ne'ebé Shakharov tuir mai dezenvolve liu no ita ikus ne'e kona ba injunsaun hatudu iha orasaun ba starets no komunika husi nia ba nia disipulu: 'husik ita nia hanoin iha infernu no keta neon-kraik!'" Norman Russell, *Theosis and religión* (Cambridge University Press 2024), p.169

<sup>8</sup> Marcos 2:1-12. Nota forsa esperanza nian iha mane ne'e nia belun sira ne'ebé manan obstakulu hotu, sobuk uma kakuluk, koko atu tulun nia no lori ni aba Jesus.

<sup>9</sup> Verbu Gregu *σπλαγχνίζομαι* (splanchnizomai) ne'e emosionalmente forte tebes. Nia indika mamar no hatán kompasivu ba nesesidade. Susar atu tradus: kompaisaun, kuitadu, simpatía, hotu-hotu fo sai buat ruma kona ba ne'e. Maibé "nia fuan monu ba sira" karik expresa kompletu liu kona ba verbu ne'e. Iha Mateus (14:14, 15:32, 18:27, 20:34), verbu ne'e laos deit refere ba emosaun ka sentimentu, maibé designa mós resposta praktiku hodi hatán ba nesesidade. Iha kazu ida ne'e, Jesus kura ema moras hafoin fo han ema lubun boot. Emosaun resulta iha kuidadu aksaun efektivu.

<sup>10</sup> Cf. 1Tim 4:10 "ba ida ne'e ita ke'e no terus, tamba ita tau ita nia esperanza iha Maromak moris, maksoin ema hotu nian, liu-liu ba sira be fiar."

<sup>11</sup> Cf Hebreu 6:19

<sup>12</sup> Cf 1 Tesalónica 5:8

---

<sup>13</sup> *Sínodo kona ba Sinodalidade halo Uma-Kreda Católica rekoñese no valoriza diversidade ne'ebé eziste tiha ona iha nial aran. Papel delegadu sira husi igreja seluk iha sínodo ne'e importe tebes. Ida ne'e fo esperansa foun ba vokasaun ekumenikal iha dalan ba unidade ba ema hotu be hadomi Cristo?*

<sup>14</sup> *Taizé iha tempu funu. "Parábola komuñau" nian ne'ebé ami hakaas-an atu moris un'udar maun-alin husi kreda, rai no kultura la hanesan presiza tau-matan nafatin nune'e be sai sinal esperansa nian ba familia humanidade be fahe-malu.*

<sup>15</sup> *Cf Romano 8:21-23*

<sup>16</sup> *Iha sasatan/desafiu mudansa klimatika no diversidade nia lakon, oinsa ita bele haklean ita nia kuidadu ba uma komun be buat hotu liga ba malu?*

<sup>17</sup> *Iha Komunidade Taizé ami kontinua nafatin verifika lialos hasoru ho akuzasaun sira contra abusu no asaltu be ema halo hasoru irmaun balun. Ema sira be terus ona no aten-brani atu ko'alia sai ita tenke aprende husi sira. Dala barak, sira buka bebeik esperansa foun no moris. Sira motiva ita atu halo buat hotu be bele (see [www.taize.fr/protection](http://www.taize.fr/protection)) atu halo sorumutu be hala'o iha taizé no fatin seluk seguru ba ema hotu no mós atu hamoris konsiensia kona ba kazu sira kona ba ne'e. Ami mós agradesse ba komisaun ba Rekoñesimentu no Reparasaun (see [www.reconnaissancereparation.org/](http://www.reconnaissancereparation.org/)) ba sira nia ron aba sobrevivente sira no sira nia mediasa.*

<sup>18</sup> *"Ha'u fiar katak fiar liga ho lialos. Too wainhira ha'u simu prospectu mate nian, ha'u la bele laran-metin. Ida ne'e aplika ba situasaun hotu. Nu'udar Kristaun, ita bele iha tendencia atu halai husi situasan be halo ita lakon esperansa – políticamente, ekolojikakmente, humanamente... normal ba ita atu tauk ho sira, maibé, ba ha'u, parese hanesan esperansa enkoraja ita atu hamri'ik iha ne'ebá duni, iha realidade situasaun sira ne'e nian, atu hateke ba sira ho lialos. Georges Bernanos ko'alia barak kona ba esperansa nu'udar virtude heroico ida. Virtude ida ne'ebé dudu ita ba aksaun, la'os atu halai, atu hafunu ba buat be ita hatene no fiar katak di'ak. Esperansa lori ita ba Maromak nia promesa." Clémence Pasquier, interview by Clémence Houdaille, La Croix 11/10/2024*

<sup>19</sup> *Iha lian Kikuyu (Gĩkũyũ), naran/atributu ida ba Maromak mak "soi-esperansa"- "Mwĩhokeku": Maromak be ita bele laran-metin ba. Mwĩhoko – Esperansa; Wĩhokeku – soi duni ba Esperansa; Mwĩhokeku – soi-Esperansa e.g. Ngai nĩ mwĩhokeku | Maromak mak soi-esperansa.*

<sup>20</sup> *"Karik esperansa mak foti sasukat perigu ohin lora nian, nia mós hanorin ita atu moris iha presente no fiar iha futuro, la ho hela iha pasadu no husik hotu resentmentu sira. Ida ne'e, ikus mai, sa mak ita nia klamar hamlaha ba no ninia absensia halo ita nia klamar sai moruk no violentu. Nu'udar domin iha libru Cantico dos Canticos, esperansa huu hikak moris ba isin be desesu hamate tiha." Corine Pelluchon in L'espérance, ou la traversée de l'impossible (Éditions Payot & Rivages, Paris, 2023) pp. 13-14*

<sup>21</sup> *"Ida be iha kruz terus hanesan ita, un'dar la folin, mak haroman ita nia trajiku ezistensia humana... ita la hateke deit ba Jesus nu'udar ejemplu ida tuir, la'os mós atu ita koko idola nia. Ita hare'e Jesus nu'udar Maromak be hola-isin ema nian no terus no halerik ho ita." Kwok Pui Lan, theologian who hails from Hong Kong, "God Weeps with Our Pain," in New Eyes for Reading: Biblical and Theological Reflections by Women from the Third World, ed. John S. Pobee and Barbel von Wartenberg Potter (Meyer Stone Books, Bloomington, IN, 1987), p. 92*

<sup>22</sup> *Cf João 12:32*

<sup>23</sup> *"Dame hela ho imi, Ha'u nia dame ha'u fo ba imi. Jo. 14:27. Karakteristika ema ida be maduru los ona ne'e la fasil atu sasan mundo nian, nakdedar tan tauk, laran-taridu tan deskonfiansa... maibé atu hamri'ik metin iha fiar, hanesan los iha hela tasi ninin be firme no seguru, iha ameasa banjir no tormenta mundo nian. Firmeza ida ne'e mak Cristo lori ba Kristaun sira nia hanoin, inspira sira ho dame interior ba sira be liu ona terus." Ambrose of Milan, Treatise III, On Jacob and the Blessed Life 6, 28, quoted in Soyons l'âme du monde (Les Presses de Taizé, 1998 and 2025) p. 109*

<sup>24</sup> *Hare'e [www.taize.fr/pilgrims-of-peace](http://www.taize.fr/pilgrims-of-peace)*



### **Staying longer in Taizé**

The meetings in Taizé are possible thanks to young volunteers, aged between 18 and 29, who remain for longer – between a few weeks and a year. The brothers share with them what is most essential in the life of the community:

#### ***Together... praying***

Nothing in Taizé would be possible without the three common prayers, and it is also through prayer that the volunteers help to welcome all those who come.

#### ***Together... living in community***

Forming a small, temporary community with young adults from every continent, from different Churches, in the shared richness of diversity.

#### ***Together... serving others***

Making it possible, by being available, for young people to be welcomed in Taizé.

[www.taize.fr/volunteering](http://www.taize.fr/volunteering)

### **Continuing a journey together in 2025**

- International meetings in Taizé from Sunday to Sunday for young adults aged 18 to 35
- From 13 to 27 April, Holy Week and Easter Week in Taizé
- From 13 to 18 July, Friendship meeting between young Muslims and Christians
- On 30 and 31 July, prayers with songs from Taizé in Rome during the “Youth Jubilee”
- From 17 to 24 August, a week of sharing and witnessing Orthodox faith
- From 24 to 31 August, a week of reflection for young people aged 18 to 35
- From 28 December 2025 to 1 January 2026, the next European Meeting of Young Adults, whose venue will be announced in Tallinn.

[www.taize.fr/dates](http://www.taize.fr/dates)